



*Minggu, 13 Maret 2022*

**Ogen: Yesaya 66:10a**



**Radu ras Ermeriah Ukur**



**M**inggu Passion pelimaken, igelari pe minggu Letare si mertina teridahlah. Minggu e mpersingeti kita kerna kiniseran Tuhan Jesus i bas IA erbahan si mehuli. Sura-surana nelamatken manusia perdosa, ilawanna kuasa-kuasa si jahat si atena meneken manusia. IbabaiNa pe manusia ku bas kegeluhen si mehuli.

Kai si ibahan Tuhan Jesus e situhuna enggo leben igambarken i bas padan si ndekah e me tupung Dibata engkelengi bangsaNa. IpulahiNa i bas pembuangan Babel nari, kuta pembuangan si labo pernah maba keriahen man Israel. Italuken Dibata kerina bangsa-bangsa si pernah naluken kalak Israel dengen iukumNa kerina bangsa-bangsa si megombang man baNa. IbabaNa mulih Israel ku negerina jine. Labo ban mehulina Israel tapi bage kin si enggo ipadanken Dibata. Keleng ate e rehna i bas pusuh Dibata si mbagesna nari. Nina Dibata, bangsa e enggo Ku petubuh, Ku arak-arak, dengen Ku pebelin-belin, banci kin Ku ambati ia mulihken tubuh i kutana? Kenca lepas masa pembuangan e, Israel ibaba Dibata mulih ku Jerusalem. I je iajari Dibata ia mulihi jadi bangsa si mehuli, bangsa si nembah Dibata, bangsa si naksiken Kuasa Dibata man doni enda.

Bagi si enggo ibahan Dibata man Israel, bage me perbahanenNa man manusia. Dibata reh i bas diri Tuhan Jesus, si enggo naluken musuh-musuhta e me kuasa-kuasa kegelapen si mabai kita reh dauhna ras Dibata. I bas kekelengenNa, Jesus erjuang tuhu-tuhu guna keselamatenta. Nggit IA mate pe i kayu persilang gelah kita nggeluh rasa lalap. Teridah ras tergejap me kekelengen Dibata e. Pengajuk man banta i bas kita ngaloken kekelengen e e me ermeriah ukur radu ras Jerusalem. Kita ibebasken arah kuasa-kuasa si jahat, kita imenangken Kristus, janah lit jaminen ndatken kegeluhen si mbaru.